

SADAR DISTRICT SEMINAR PAPER 2010.

Amun : LELTON P/C

Ahun : 04th. SEPT. 2010.

Thupi : PRESBYTERIAN CONSTITUTION (DAN) .

INTRODUCTION :

Presbyterian constitution hi kochuam sunga ki etkawl nading leh kikai huai na dinga dan um chu ahi. Constitution gen na ding ahin achia dan (Govt.) le gen angai hi. Chun aki vaihawm dan gen chian na ding in pawldang te chiadan le neu khat gen khak ahi.

Presbyterian kochuam hi khawvel ah kochuam lian pen pawl leh chia dan nei hawi pawl ahi Presbyterian ti thu mal hi Greek pau 'Presbuteros' ti saptan Presbyter ti apat lak daw ahi. Amin um zia chu Upa kiti na ahi. Zia zia ahin Presbyterian Kochuam hi Upa Kochuam ti ah hiat ahi. Hima leh Upa ti hin Kochuam khat ah Upa namdet te chau huap ahi pua, Upa te leh Pastor te huap ahi zawi. (Philipi 1:1, I Timithi 3:1,8).

Kochuam chia dan tangpi:

Kochuam chia dan gen chian zawk diak na din Kochuam dang te chia dan tangpi vak en hi tiu.

1 .Episcopal:

Bishop vaihawm na kochuam ahiu. Zia dan zui te hi Anglican, MCI, CNI, CSI, te ahiu. Akochuam hotu pen uh chu khawmpi hilo in Bishop te ahiu.

2. Papacy:

Roman Catholic kochuam ahiu Pope vahawmna ahia, Pope apat chun thunei na ki pe sawn zel in kochuam chu a enkol uh ahi.

3. Congregational:

Amah hi tual sung lalpen na /thu nei na kochuam ahiu. Khawmpi vaihawm na ti te haw hi amin in nei tho sek ma leu tual sung kochuam tin ten thu nei na (Autonomy) anei chiat ua amah chiat in aki chun chuam mai uh ahi. Baptist te, Free church te te ahiu.

4.Presbyterian:

Presbyterian kochuam chu hotu chuam umlo ah mipi te thasang ah upate vaihawmna kochuam ahi. Presbyterian kochuam hi jiajiak ahin COMMITTEE PHAWT HITIU ti te ahiu. Presbyterian kochuam ahin vaihawmna (church court) kisuang sawn panga anei a, jiate chu- (1) Tualsung committee (2) Bial khawmpi. (3) Presbytery. (4).Synod (5). Gen. Assembly. ahi. Chun, vaihawmna josia hi khawmpi leh committee thu vek ahijiak in mimal dawidan in a chia ngai puai. Zia hi Presbyterian danglam na chu ahi. Church Court khat in thu asai fel theilo chu asang zaw atat ding ahi. Vaihawmna ki suang sawn ahi zia in thulut him him chu Church Court khat kan tan ah asang zaw alut ngailo ahi. Zia hi Presbyterian aza um na ahin, ziaziak ahin saipi chia ah chia atiu nau chu ahi.

Dan (Constitution) :

Dan hi Presbyterian kochuam in mipite Thagau lam ah kikai huai na ding ah asiam ahia. Dan hi det tak mai hi thou in, agam leh mun zil ah kochuam te phatchuam na ding ahi leh, kajun thei/kaichip thei ahi. Zia chu, Presbyterian dan ahoi diak na chu ahi. Himaleh, banglam hi ta hen lang, bangjiak hi leh kijun thei atai ti hin Presbyterian dan chu suk kek aphal puai. Dan sung ah chia zel in akajun thei/kaichip thei jaw ahi. Dan suksiat phal hi ta leh mumal neilo hi ding ahi.

Kochuam Committee siam dan leh Hotute :

Tualsung kochuam enkawl ding in committee kumthum ading ah tel hi ding ahi. Chun, committee hi siamfel ahi phat leh hotu ding te guat ding ahi. Bial Pastor chu abial sung kochuam khoi ale aum na phawt achun Chairman hi ding ahi. Upate chu member hin nau, kochuam piting na gam achun Pastor umlo na in Committee aum ngai puai.

Thunun na lam :

Thunun na hi kochuam vaihawm na thil pawimaw tak leh azui zing ding chu ahin. Thagau lam hinkhua ading ah member siam phatna, Pathian lopi na ding leh kochuam thiangtho nading ah panpitu hoi tak ahi.

Synod in Thunun ting ah angaite :

Dan bawtsia ta phawt chu thunun ding ahi. Thunun na tinga bawtsiatna chu - Tualtha, Kingaina sual ah puk te, Uire, Aisan. Kristian ginna kal zawnga sakhaw biakna, dan bawtsia dang Synod in thunun na piak ting asakte.

Nawsua/Nawdaw -

Nawsua hi thunun na bak khat ahi. Kochuam member kuale thil hikhial tu te member ahi na lip piak hi ahi. Thil diklo lulul tak ah hi tei tei te chung chau amat ahi. Nawsua ah um te hi kum ni tiang biak chanvo piak lo ding ahi.

Kingaina sual ah puk te -

Kochuam member kingaina sual ah puk te chu, achawm pen ah thaguk sung thunun na piak ding ahi. Zia nung achu aki chen phat ua, agitlo nau asim ua, kochuam achung ua alung awi ahi chun thunun na chu lip piak thei ahi.

Uire chungchang -

Nupan kua le Uire ah puk phawt chu thu nun na piak ding ahi. Uire te chu nupan ah aum nawp ua leh dan dungzui in kumthum nung in RC leh RL piak thei hin ah. RL piak nung in kochuam dan in ki cheng thei bep in nau. Zia nung achun kochuam achung ua alung awi ahi chun, laklut thei hin nau.

Uire nung ah ki chenglo ah kikken ahiu leh kopi neilo zawk chu tha guk nung in kochuamte achung ah alung awi ahi le laklut thei hin nau. Kawppi nei sa chu RL piak dan zui in ah.

Dan khenkhat te :

Pawl dang dan ah ki chen gawte -

Presbyterian in apawm theilo pawl dang dan ah kichen gawte chu kochuam mi leh sa hi ziang leule lekha atak piak/apuan piak ngailo ahi.

Ama kithatte -

India gam Presbyterian kochuam Assembly (1990). achun kochuam mi ama ki that te chu vui dingin pha asa ahi. Avuina chu zia gual ahin - a). Dak khetlo ding. b). Mithi inkuan te ading ah thamuan na thu gen. c). Kochuam Prog. hilo in Pastor khut ah ki nga ahi.

Trinity leh Krista min -

Pa leh Chapa leh Thagau thiangtho min leh kochuam te luchang Krista min hi Presbyterian kochuam in apawm gel gel hi. Ahi ziakin Pa leh Chapa leh Thagau thiangtho min hi kichen na, Baptisma, Nau latna longal in aki mang bek puai. Krista min ahi leh Inn hawn na Thansuang hawn na leh adang dang in mat ahi.

Chutna/Chutdan -

Presbyterian kochuam dan ahin Thu leh Sacrament hi apawimaw pen ahi. Bialtu Pastor hiatlo in Sacrament table hi chawn daw ngai lo ahin chuleh chutna hi committee hiatlo in siam danglam theilo ahi. Chun, chutdan in Numei veilam, Pawsal changlam tihi dan aum puai.

Thawlawm leh Nau lat dan -

Thawlawm lat dan ahin lat sung ah chut/ding thu hi dan aum puai. Alan tute ah kinga ahi. Pathian chawihawi na ding ah ding vang akilawm ahi. Chu leh Nau lat thu ah khut ngat leh ngatlo thu hi dan in aum puai, alan tute khut ah kinga ahi.

Numei mun dang ah Pawsal nei -

Numei mun dang ah Pawsal neite hi thunun na anutsia kochuam ten apetei sek ui. Laklut na lam ahi leh vang alutna kochuam ten angai tua ding uh ahi. Thunun na pe tu kochuam ten alut na lam kochuam te thununna piak ahi dan a hiatsak ding ahi.

Naupang Baptisma thu -

Naupang Baptisma hi Presbyterian pawm dan ahi. Zia hi Judate dan apat kila pan ahi. Chuleh, Thuthung thak ahin le tamtak pansan na thei aum hi. Naupangte hin Baptisma hi ahethiam nai puau; maleh hepina thuthung ah thu tiam go luatu ahi. Lal Jesu ngei in “Naupangte ka kianga hung sak un la zada kiu in - Pathian gam chu zia gual mite ading ahi ngal ah” ati kha.

Zia Naupang Baptisma hi Cyprian, Carthage khua Bishop in ala pat ahi. Ama ngai dan in Naupangte hin Adam gitlona apuak zel ziak un tui ah Baptisma ah silthian hi apawi mawi ala ti ahi.

Thuthung thak ah :

a). Naupang Baptisma pawmten Thuthung thak ala pansan nau chu “Inkuan Baptisma” ti ahin Naupang te le pang ngei ding ah ginchak ahi. Aziak chu Judate dan achun Inkuan ti ahin Naupang le apang sek uh ahi. E.g. Kornelia te inkuan. Acts- 10:30,48. Ludia- 16:15 Suangkul ngakpa. Stephen- I Kor.- 1:16.

b). Abraham suante Pathian nam tel etsakna ah, Naupangte zek atan gual un ginna ziak ah Pathian nam tel ten Naupang Baptisma bawl ngai in agel ui. Kolosa- 2:11.

c). Thagau lam ahun piting na ding un Nu leh Pate khut ah ngat ahi.

Conclusion :

Achunga ki gen te beb hilo in dan thu hi tamtak gen ding aum nalai a maleh, akul diak te beb ki taklang ahi. Presbyterian dan hi Persia dan gual ah suk dang lam theilo chu ahi pua, kochuamte masawn na ding ahi phawt chun ahuap lian ahi. Ahin lah zia chu dan pi umsa chia dan leh kipuakdan anei guala achia ding ahi.

Lekhabu et te -

- 1). An outline of Christian beliefs. By - O.M. Roa.
- 2). Pathian Biak in khawm hruaina Bu.
- 3). Kohran inrel bawlina. By - Z.T. Sangkhuma.
- 4). Presbyterian kohran. By - Siaaithanga.
- 5). Nupa dan chungchang.
- 6). India gam Presbyterian kochuam dan bu.
- 7). Manipur ram Presbyterian kohran chanchin.

Presented by :

P/P. Siama Phaltual.